

AKHBAR : KOSMO
TARIKH : 05 JANUARI 2021
SENTIMEN : NEUTRAL

MUKA SURAT : 17
HARI : SELASA

Rezeki dua beradik musim PKP

SHAH ALAM - 'Cuti' panjang sesi persekolahan akibat fasa Perintah Kawalan Pergerakan (PKP) dimanfaatkan dua beradik mengasah bakat dalam pertandingan melukis, mewarna dan bercerita.

Penyertaan Iskandar Zulkarnain Mohd. Nazereen, 10, dan adiknya, Khalid Al-Walid, 8, yang merupakan murid Sekolah Kebangsaan Sungai Rawang, Sepang dekat sini ternyata membuahkan hasil apabila meraih pelbagai anugerah termasuk wang kemenangan terkumpul keseluruhan lebih RM3,000.

Menurut Iskandar, minatnya terhadap dunia seni susulan didikan ibu bapanya selain memastikan pengisian sepanjang sesi persekolahan yang ditutup akibat pandemik Covid-19.

Katanya, dia menyertai sebanyak 39 pertandingan melukis poster dan mewarna dalam tempoh sembilan bulan ini dengan 17 daripadanya membuahkan hasil.

"Seronok sebab ada aktiviti boleh diisi dan tidak sangka menang seterusnya menjadikan satu hobi dan pembelajaran sepanjang cuti ini," katanya kepada *Kosmo!* di sini semalam.

Kata anak sulung dua beradik itu peraduan mewarna yang menobatkannya sebagai pemenang adalah seperti Ihya Ramadhan anjuran Jabatan Halal QL Foods; My Superhero Daddy dikendalikan My Art Studio, Poster Co-



ISKANDAR (tengah, depan) dan Khalid (kanan) bersama bapa, Mohd. Nazereen serta ibu, Nadirah Sanusi, 38, menunjukkan hadiah dan sebahagian lukisan dihasilkan sepanjang fasa PKP ini.

vid-19 oleh Fairuz Agency.

"Saya juga memenangi simpanan SSPN-i bernilai RM1,000 anjuran Cuepacs Care yang boleh dijadikan bekalan untuk kewangan pendidikan masa depan saya," jelasnya.

Khalid pula berpandangan 2020 perlu menjadi tahun dikenang walaupun tidak dapat mengikuti proses pembelajaran seperti kelazimannya.

"Pertandingan ini membentuk sahsiah diri saya terutama dalam

pengucapan awam apabila memenangi tempat pertama bercerita Raya Kali Ini anjuran IKRAM Kuala Nerus.

"Kalau dikira, saya sudah memenangi 15 daripada 35 penyertaan dan menganggapnya sebagai rezeki musim PKP," ujarnya.

Sementara bapa mereka, Mohd. Nazereen Ibrahim, 38, memberitahu, penglibatan kedua-duanya itu bagi melatih perkembangan kreativiti mereka dalam bidang seni tersebut.